



 BOSNA I HERCEGOVINA PARLAMENTARNA SKUPŠTINA BOSNE I HERCEGOVINE SARAJEVO			
PRIMJENO: 25.11.2013			
Broj posla	Klasifikaciona oznaka	Redni broj	Broj priloga
01-	02-1-	53/13	1

Broj/Број:

Sarajevo/Сарајево: 25.11.2013.

PARLAMENTARNA SKUPŠTINA BOSNE I HERCEGOVINE
PREDSTAVNIČKI DOM
KOLEGIJ PREDSTAVNIČKOG DOMA

Predmet : Prijedlog zakona o praznicima Bosne i Hercegovine

Na osnovu čl. 99. i 100. Poslovnika Predstavničkog doma Parlamentarne skupštine BiH („Službeni glasnik BiH”, br. 33/06, 41/06, 81/06, 91/06, 91/07, 87/09 i 28/12) kao ovlašteni predlagač, dostavljam Vam **Prijedlog zakona o praznicima Bosne i Hercegovine** radi razmatranja i usvajanja u Parlamentarnoj skupštini BiH.

Predlažem da se procedura razmatranja i usvajanja ovog prijedloga zakona provede po redovnom zakonodavnom postupku.

U prilogu dostavljam tekst Prijedloga zakona s obrazloženjem na bosanskom jeziku i elektronsku verziju Prijedloga zakona.

S poštovanjem,

Poslanik SDP BiH
dr. sc. Denis Bećirović

Na osnovu člana IV. 4. a) Ustava Bosne i Hercegovine, Parlamentarna skupština Bosne i Hercegovine na __. sjednici Predstavničkog doma, održanoj __. __. 2013. godine, i na __. sjednici Doma naroda, održanoj __. __. 2013. godine, usvojila je:

Z A K O N

O PRAZNICIMA BOSNE I HERCEGOVINE

POGLAVLJE I. OPĆE ODREDBE

Član 1. **(Predmet)**

Zakonom o praznicima Bosne i Hercegovine određuju se dani praznika Bosne i Hercegovine, vjerski praznici te dan sjećanja, način njihovog obilježavanja i praznovanja od strane građana Bosne i Hercegovine, svih državnih organa i institucija u Bosni i Hercegovini, te organizacija i institucija, preduzeća i drugih oblika organizovanja za obavljanje djelatnosti i pružanje usluga na cijeloj teritoriji Bosne i Hercegovine.

Član 2. **(Definicije)**

U smislu ovog zakona:

- a) „**Državni praznik**“ je dan koji se po gregorijanskom kalendaru obilježava i praznuje na teritoriji cijele Bosne i Hercegovine;
- b) „**Vjerski praznik**“ je dan koji se po gregorijanskom, julijanskom, hidžretskom, hebrejskom ili drugom kalendaru određuje kao vjerski praznik, slava ili svetkovina, te ga obilježavaju i praznuju lica koja su pripadnici tih vjerskih zajednica;
- c) „**Dan sjećanja**“ je dan koji se obilježava određenog dana u godini, na primjeren i dostojanstven način, u spomen nevinim žrtvama.

POGLAVLJE II. DRŽAVNI PRAZNICI BOSNE I HERCEGOVINE

Član 3. **(Državni praznici Bosne i Hercegovine)**

Državni praznici Bosne i Hercegovine su:

- a) Nova godina;
- b) Dan nezavisnosti Bosne i Hercegovine;
- c) Međunarodni praznik rada;
- d) Dan pobjede nad fašizmom i Dan Evrope;
- e) Dan pristupanja Bosne i Hercegovine u članstvo Organizacije Ujedinjenih nacija;

- f) Dan ustanka protiv fašizma;
- g) Dan državnosti Bosne i Hercegovine.

Član 4.
(Nova godina)

„Nova godina“ slavi se 01. i 02. januara.

Član 5.
(Dan nezavisnosti Bosne i Hercegovine)

„Dan nezavisnosti Bosne i Hercegovine“ slavi se 01. marta.

Član 6.
(Međunarodni praznik rada)

„Međunarodni praznik rada“ slavi se 01. i 02. maja.

Član 7.
(Dan pobjede nad fašizmom i Dan Evrope)

„Dan pobjede nad fašizmom i Dan Evrope“ slavi se 09. maja.

Član 8.
(Dan pristupanja Bosne i Hercegovine u članstvo Organizacije Ujedinjenih nacija)

„Dan pristupanja Bosne i Hercegovine u članstvo Organizacije Ujedinjenih nacija“ slavi se 22. maja.

Član 9.
(Dan ustanka protiv fašizma)

„Dan ustanka protiv fašizma“ slavi se 27. jula.

Član 10.
(Dan državnosti Bosne i Hercegovine)

„Dan državnosti Bosne i Hercegovine“ slavi se 25. novembra.

Član 11.
(Način obilježavanja državnih praznika Bosne i Hercegovine)

(1) Dani obilježavanja praznika Bosne i Hercegovine, navedenih u čl. 4. do 10. ovog zakona, neradni su dani za sve državne organe i institucije u Bosni i Hercegovini, te organizacije i institucije, preduzeća i druge oblike organizovanja za obavljanje djelatnosti i pružanje usluga na cijeloj teritoriji Bosne i Hercegovine.

(2) Ukoliko neki od dana obilježavanja praznika Bosne i Hercegovine iz člana 4., člana 5., člana 6. i člana 10. ovog zakona pada u nedjelju, neradni će biti i prvi naredni radni dan.

(3) Za neradne dane utvrđene ovim zakonom zaposleni imaju pravo na naknadu plaće kao da rade.

(4) Obilježavanje praznika Bosne i Hercegovine vrši se isticanjem, na odgovarajućem mjestu, simbola Bosne i Hercegovine u skladu sa zakonom.

POGLAVLJE III. VJERSKI PRAZNICI

Član 12. (Vjerski praznici)

Vjerski praznici su:

a) za pripadnike islamske vjere:

1. Nova hidžretska/muslimanska godina (jedan dan);
2. Dan rođenja Muhameda (jedan dan);
3. Ramazanski bajram (dva dana);
4. Kurbanški bajram (jedan dan);

b) za pripadnike katoličke vjeroispovijesti:

1. Bogojavljenje (jedan dan);
2. Tijelovo (jedan dan);
3. Uznesenje Blažene Djevice Marije ili Velika Gospa (jedan dan);
4. Svi Sveti (jedan dan);
5. Božić (jedan dan);

c) za pripadnike pravoslavne vjeroispovijesti:

1. Božić (jedan dan);
2. Sveti prvomučenik i arhidakon Stefan (jedan dan);
3. Duhovi (jedan dan);
4. Veliki petak (jedan dan);
5. Vaskrs (jedan dan);

d) za pripadnike jevrejske vjeroispovijesti:

1. Sukot (jedan dan);
2. Šavuot (jedan dan);
3. Pesah (jedan dan);
4. Roš Hašana (Nova godina) (jedan dan);
5. Jom Kipur (Dan pomirenja) (jedan dan);

e) za pripadnike ostalih vjera u Bosni i Hercegovini pet dana u godini za obilježavanje vjerskih praznika.

Član 13.

(Način obilježavanja vjerskih praznika u Bosni i Hercegovini)

- (1) Ukoliko neki od dana obilježavanja vjerskih praznika u Bosni i Hercegovini iz člana 12., ovog zakona pada u nedjelju, neradni će biti i prvi naredni radni dan.
- (2) Za neradne dane utvrđene ovim zakonom zaposleni imaju pravo na naknadu plaće kao da rade.

POGLAVLJE IV. DAN SJEĆANJA

Član 14.

(Dan sjećanja na žrtve genocida u Srebrenici)

„Dan sjećanja na žrtve genocida u Srebrenici“ obilježava se 11. jula.

POGLAVLJE V. PRIJELAZNE I ZAVRŠNE ODREDBE

Član 15.

(Izuzeci od praznovanja)

Ukoliko priroda djelatnosti, odnosno tehnologija procesa rada, zahtjeva neprekidan rad, Vijeće ministara Bosne i Hercegovine, vlade entiteta i Brčko Distrikta Bosne i Hercegovine ili drugi nivoi vlasti u skladu sa svojim nadležnostima, mogu odrediti koje institucije, organi, organizacije, preduzeća i drugi oblici organiziranja za obavljanje djelatnosti i usluga su dužni raditi i u kojem obimu na dane praznika utvrđenih ovim zakonom.

Član 16.

(Usaglašavanje propisa)

- (1) U roku od šest mjeseci od dana stupanja na snagu ovog zakona, entiteti i Brčko Distrikt Bosne i Hercegovine obavezni su svoje zakone o praznicima uskladiti s ovim zakonom.
- (2) U roku od šest mjeseci od dana stupanja na snagu ovog zakona uskladit će se odredbe člana 30. st. (1) i (3) Zakona o radu u institucijama Bosne i Hercegovine („Službeni glasnik BiH“, br. 26/04, 7/05, 48/5, 60/10 i 32/13) sa odredbama ovog zakona.

Član 17.
(Stupanje na snagu)

Ovaj zakon stupa na snagu osmog dana od dana objave u „Službenom glasniku Bosne i Hercegovine“.

PSBiH, broj _____/_____

Sarajevo

Predsjedavajući
Predstavničkog doma
Parlamentarne skupštine
Bosne i Hercegovine

Predsjedavajući
Doma naroda
Parlamentarne skupštine
Bosne i Hercegovine

O B R A Z L O Ž E N J E

Zakona o državnim praznicima Bosne i Hercegovine

I. USTAVNI OSNOV

Ustavni osnov za donošenje Zakona o praznicima Bosne i Hercegovine sadržan je u odredbi člana IV 4. a) Ustava Bosne i Hercegovine, prema kojem je Parlamentarna skupština Bosne i Hercegovine nadležna za donošenje zakona potrebnih za provođenje odluka Predsjedništva Bosne i Hercegovine, ili za vršenje funkcija Parlamentarne skupštine Bosne i Hercegovine prema Ustavu Bosne i Hercegovine, kao i u članu II 3. g) Ustava Bosne i Hercegovine prema kojem sva lica na teritoriji Bosne i Hercegovine uživaju ljudska prava i slobode iz stava (2) ovog člana, što uključuje i slobodu misli, savjesti i vjere.

II. RAZLOZI ZA DONOŠENJE ZAKONA

Članom I.1. Ustava Bosne i Hercegovine je, između ostalog, propisano da Bosna i Hercegovina „*nastavlja svoje pravno postojanje po međunarodnom pravu kao država, s unutrašnjom strukturom modificiranom ovim ustavom i u postojećim međunarodno priznatim granicama*“. Također, u Anex-u II.2. Ustava Bosne i Hercegovine navedeno je da „*svi zakoni, propisi i sudski poslovnički, koji su na snazi na teritoriji Bosne i Hercegovine, u trenutku kada Ustav stupi na snagu, ostaju na snazi u onoj mjeri u kojoj nisu u suprotnosti sa Ustavom, dok drugačije ne odredi nadležni organ vlasti Bosne i Hercegovine*“.

U skladu s navedenim odredbama Ustava i savremenim potrebama države Bosne i Hercegovine, nužno je pristupiti dogradnji zakonskih odredbi kojima se regulira pitanje praznika u Bosni i Hercegovini. U prilog ovoj konstataciji ide i zaključak Predsjedništva Bosne i Hercegovine koji je usvojen još 1999. godine (*konkretnije, na 59. sjednici, održanoj 6.10.1999. godine*), a koji govori o potrebi pristupanja donošenju novog Zakona o praznicima Bosne i Hercegovine. Nažalost, navedeni zaključak u proteklim godinama nije realiziran.

Zakon o praznicima Bosne i Hercegovine priznaje sve različitosti u vezi sa religijskom pripadnošću i tradicijom građana i naroda u Bosni i Hercegovini, te propisuje da su vjerski praznici neradni za vjernike – u skladu s njihovom vlastitom odlukom i opredjeljenjem, dok su državni praznici Bosne i Hercegovine neradni za sve građane, državne organe i institucije.

III. OBRAZLOŽENJE RJEŠENJA

Zakon se sastoji od pet poglavlja:

U prvom poglavlju se naznačava sadržaj zakona, preciziraju subjekti na koje se odnose odredbe ovog zakona i definiraju pojmovi važni za razumijevanje teksta.

U drugom poglavlju definirani su državni praznici Bosne i Hercegovine, koji se obilježavaju kao neradni dani na cijeloj teritoriji Bosne i Hercegovine. Precizirani su datumi njihovog obilježavanja i način obilježavanja.

Treće poglavlje regulira vjerske praznike na način da, kao vjerske praznike, definira sve dane koji su po gregorijanskom, julijanskom, hidžretskom, hebrejskom ili drugom kalendaru određeni kao vjerski praznici, slave ili svetkovine, te ih obilježavaju i praznuju lica koja su pripadnici tih vjerskih zajednica. U skladu sa važećim zakonodavstvom, pripadnicima svih vjeroispovijesti daje se mogućnost korištenja plaćenog odsustva u trajanju od pet dana u toku jedne kalendarske godine za zadovoljavanje njihovih vjerskih, odnosno tradicijskih potreba.

Četvrto poglavlje precizira datum obilježavanja Dana sjećanja na žrtve genocida u Srebrenici.

Konačno, petim poglavljem, precizirano je da danom stupanja na snagu ovog zakona prestaju važiti svi propisi koji nisu u saglasnosti s njim, te je utvrđen rok u kojem su mjerodavni subjekti dužni svoje propise usaglasiti s ovim zakonom i preciziran datum stupanja na snagu zakona.

IV. FINANSIJSKA SREDSTVA ZA PROVOĐENJE PROPISA

Za provođenje ovog zakona nisu potrebna dodatna i posebna finansijska sredstva.